

夢樓詩集

夢樓詩集卷十

丹徒王文治禹卿

歸人集

滇中自丙戌之冬有平莽之役逾年繼以平緬余來
往瘴鄉感河魚之疾丁亥秋適以鐫級解郡遂循例
告歸陸行三十日舟行五十餘日所見山光水色古
蹟名藍輒有題詠得古今體詩六十三首

解郡

我生本是江海人箕踞長松磅礴偶然作賦侍 彤廷
簪筆頭廳趨馭娑典郡 新恩豈不盛邊陲重任殊難荷
有如猴獠入布袋又似老兵挽官箚今軍令正分明坐
待窮荒掃么麼自惟拙者宜退居所以陳吏議可莫笑

一官竟付人且喜此身才屬我晚來對酒忽能狂曉日熟
眠真覺妥青鞵布襪唯所適五岳名山興亦頗亟須行盡
黔中山早向江頭買輕舸

畱別方伯二首

本是當年裴晉公不關名字偶然同籌邊鶴髮垂垂白拂
幘蠻花故故紅贈策務申謀國意徒薪肯伐建言功轅門
拜手辭公去回首秋林驛路中

乘軒野鶴一離羣香案迢迢隔五雲卑辱敢稱前進士
護持唯有大將軍宵烽羽檄驚塵夢齒露炎風驗舊聞今
日朝衫因病解江南山色正斜曛

題畫

王孫池館閉朱扉中酒心情燕未歸獨有狸奴閒趁蝶一
坪芳草向斜暉

商寶意前輩挽詞二首

南服循良守東中詩酒豪誰憐江左玉虛夢益州刀瘡雨
連邊塞秋風入戰袍生天知有恨未見角弓橐

文舉忘年友元方部下民

寶意曾爲
吾郡司馬

每從金齒外同憶玉

堂春詩借郵筒遞經從官廨論鑑湖三百里白首負垂綸

龍貞女詩

有序

貞女姓龍氏滇之昆明人進士劉恬聘爲繼室合

卺牽絲將有日矣而乃公明才儁福遜庸人叔寶

神清相非壽者貞女將投身於瀨水抗跡於汨羅

上天鑒佑已絕復甦鄰里代爲之悲父母莫移其志先是劉君元配藐有遺孤賴巾幘之程嬰爲家門之周勃茹荼晝荻八歷寒暄卒以憂能損人才不偶數年未三十嘔血而終蓋卷施之草心本易傷其命之禽理無獨活矣貞女幼通經史善屬文內言不出世罕聞知孤子平矜頗能口誦摹曹娥之碑版每動悲哀聽女娉之砧聲無非激楚鵲呼崩城哭市或無飛絮之才習禮明詩或乏貞松之節以文兼行自古爲難考厥遺徽有裨風化也乃表以詩

重門苔跡厚一徑閉蒼蒼里合名全節詩曾譜斷腸玉因

含璞貴蘭以被煎芳寄語貞松質無須怨雪霜

題畫

豆棚風折曉瓜架雨催秋借問灌園者休言是故侯

錢瑾巖見予解郡詩承賦長短句見贈推獎逾分
用荅斯篇

仲若依招隱義之臥會稽自緣藏下劣非敢慕高棲生計
刪蛇足歸心信馬蹄他年尋釣艇祇在暮江西

次韻于勿梅題潘船溪大林歸棹圖

自我來滇中遂與朋友左鄉心望白雲舊好念青瑣常思
拏米船弭節看澹漣無如困簿領欲去足仍裹君從故園
來行篋畫歸舸茶具及詩筒餘地堪著我時我方左遷旁

夢村言集 卷一 三
觀笑壞珂豈知病乘黃正望脫韁鎖告歸我自急小住君
亦可待我草堂成期君至傾坐

題趙仲穆虬髯客圖

李楊宮闕俱成塵扶餘國王尙寫真當時若逐太原起僅
偕褒鄂圖麒麟四海之隅復四海帝廢王興君莫駭中原
龍戰幾百年天外相看如傀儡君不見漢宮第一王明妃
畫圖失意無容輝琵琶出塞信豪舉猶堪朔漠稱閼氏人
間得喪夫何有雞口終須勝牛後不然蓄異成閹干操莽
千秋爲賊首趙家父子擅筆精丹青摹繪如平生英雄氣
概已磊落美人意態還娉婷因知一妹亦人傑眼底奇才
能識別盛名一代坎珂多公卿惜不如青娥

贈甯州牧張亮采

余性近薑桂雅不喜面諛君亦屈強人恥爲下風趨憶君
初到官同列笑君愚余獨識君性共君商牧芻日計雖不
足月計自有餘倥偬戎馬間暫令民氣紓比來余失郡踉
蹌天南隅官中無長物空思歸舊廬舊時姍姍者反眼秦
越殊惟君愈恭謹尺寸不敢踰麟角與鳳觜杜陵曾嗟吁
臨賀尙不負國家更何如爲君歌此詩待君驥足舒

秋日泛舟遊近華浦卽送孫象山秀才歸貴陽

秋氣萬里來蒼茫入煙靄枯荷及衰柳正與殘陽會殊方
鮮佳勝每苦雙目隘太華俯晴湖攬掇斯其最渟泓萬頃
玉遠浸參天黛飛鳥破青冥虛空不在外憶借詩太守

兩寶

意前 高宴集朋輩絲竹貫珠璣篇章出瓌怪彈指人事乖
黃墟胡可再別觴此重傾歡娛默增喟行亦買歸舟煙水
吾所愛

李柳亭明府自寫山水幅見贈酬之以詩

入夢故鄉山驚從畫裏看鴉遶秋水濶人外暮煙寒拂紙
吏方退開絨墨未乾明朝煙艇去會此問漁竿

仇十洲六十美人圖卷子

偉哉造物手日出不愛寶如何但搏沙佳質古來少仇生
老畫師畫像摹窈窕紅粧照明駝綠鬢映朱鳥花深屈戌
春月轉流蘇悄千秋號姝麗一旦此圍繞直欲破天慳豈
惟極人巧對之還太息天意殊未曉鍾靈良不易護惜倍

應早却觀人間世位置偏草草長門旣寂寞空谷亦煩惱
琵琶青塚寒厠養邯鄲老厚福歸庸庸易缺唯皦皦此定
何因緣搔首向蒼昊

納樓夷民李鶚齡工爲歌詩予守郡三年未之知
也解郡後李以詩來謁清韶婉麗有西崑之風予
旣惜相識之晚尤深愧採訪之踈矣余適歸有日
李賦詩四章贈行其警句云玉堂老鳳畱衣鉢滄
海長虹卷釣絲才力博大尤爲難得予輒效漁洋
贈費密詩體爲長句以荅猶將攜其卷帙遍示京
華鄉里諸同學不欲使之泯沒無傳焉

玉堂老鳳畱衣鉢滄海長虹卷釣絲舊事都隨雲變滅新

詞欣見錦紛披殊方那易逢佳士識面無如是別時自負
平生能說項珊瑚幾失網中枝

松風解帶圖

勁松之下清風來高人解帶相徘徊遙看明月欲相照何
處荆扉悄不開豈肯折腰爲索米未妨箕踞還傾杯應有
脂苓助輕舉拂衣一笑遺浮埃

無錫錢瑾巖工爲詩歌兼精音律新詞自倚有姜
白石之風頃余攜瑤生及鈿郎奉過彈絲品竹略
展閒情瑾巖爰製哨遍一闕贈瑤生製紅情一闕
贈鈿郎續又各贈絕句如干首重章往復詞旨斐
然昔賢云世人但解錦纏頭與汝作詩傳不朽瑤

鈿二生獲此可以傳矣二生粗諳文義頗深知己
之感求予作詩致謝

龍鍾病守擲手版萬事浮雲不挂眼尙餘結習未消除愛
近紅牙與金管去官無復持一錢二生相伴猶清妍興來
腰笛向秋月一聲吹破千林烟高言識曲姜白石閒暇相
思便相覓黃河親授畫壁詩瑾巖能歌黃河遠上詩因授瑤生絳帳戲登
講經席瑾巖曾與鈿郎同演玉茗堂閨塾劇新詞如綺寫麥光微吟齒頰生
古香若翻新譜被絲竹定教三日音繞梁東裝早晚尋歸
路春風綠到江南樹應借樵青及漁童蓑笠飄然刺船去
相君合是梁柱材卽看駟馬相如來倘余恃舊邀吹笛好
踞胡床弄一回

白雲山樵歌贈王岑

山寂寂雲逢逢雲行雲住不可定此山千古青濛濛采樵
誰氏子日日空山裏醉餘偃臥山月高醒時長嘯山風起
胷中經濟不可過一朝結綬來萬里骨相原非千戶封班
資未免百僚底相逢爲我話故山神采已在林巒間便提
雞毛筆一寫清空好山色筆端雲氣時往來徑欲飛破瑤
天碧我如浮雲無腳根東飄西泊隨風塵邇來倦飛亦知
返自慚出岫徒紛紛畫裏雲山不可到畫中有意吾能道
若非夙世住山人那得煙雲俱畫料草衣布襪青行纏明
當訪我蒼山之奧寒雲之巔

昆明逢朱子頴六十韻

結交追曩昔浪跡正京華
仄巷相過數荒臺
放眼賒耽愁
荆宋玉好俠魯朱家
涕淚因懷古纏綿爲看花
齊名私有願著論大非夸
風雨遶東帽滄溟博望槎
飢驅隨日軸分手卽天涯
尙憶高秋夜思君待月斜

予昔在海外有笋崖待月懷姬傳子願詩

龍濤晴浩淼蜃氣暮頻赧

客向重瀛返

恩緣對策加濫

竽陪紫署操鑑拂紅紗
剖璞呈良璧冲霄露莫鈇
敢矜文舉薦幸免李程差
相見初驚喜沈思轉歎嗟
浮雲今日合舊雨十年遐
每枉銀鈎札頻維白鼻騮
花香春命酒蕉暗晚烹茶
尙有詞成鳳甯無字縮蛇
畫圖窮犖确韻語鬥尖叉
世事良難定歡悰莫漫誇
一麾旋六詔雙旆亦三巴
塵務輟如蝟官書雜似麻
邊烽俄倥偬羽檄更紛拏
孟良風

鳴鏑浪滄水咽笳幾番羅怪鳥何術斬妖墓吏治君能奮
循聲 帝所嘉超遷階不次報稱意彌奢菱舍親栽樹行
車自課畚慈祥窠之母騰踏驥中驂顧我誠迂濶 殊恩
負渥洼疎應干吏牘病合解腰綱避客懸苔屐懷鄉望露
葭身纔離塵土心已入烟霞豈意同心友來停驛使車分
金邀鮑叔載酒得侯芭燈撥幽窗冷門臨曲逕衰放歌矜
格律崇議出槎枒萬派須歸海孤踪擬立華儘多隨仗馬
不礙後栖鴉君起宜扶日吾衰欲灌瓜餘糧依雁鶩野興
逐麋麇齊物師莊叟觀空悟釋迦微風吹簫笠澹日上籬
笆石穩堪趺足泉清稱漱牙田園千戶竹鼓吹兩行蛙笳
倚吟肩瘦書將老眼遮鴛鴦戀棧逆翻肯投筴去去還

須記磽磽且自汙人情忌明潔物議愛疵瑕流水琴休操
漁陽鼓莫撾淵懷銷感慨岳氣斂衿衍後會知何地封書
符散衙行騶晨蹀蹀歸艣夜吟啞怨豈關羌笛愁非爲琵琶
茫茫天接水耿耿月橫沙且復斯須立難忘笑語譁古
今俄頃耳吾道是非耶歲晚楓辭葉春回柳放芽村荒尙
菱芡江近足魚鰕他日如相訪焦廬舊號蝸

昆彌拾悟詩草子穎養疴於永昌性華寺之所作
也多生般若種子堅固於中感濁世緣隨地涌出
言詮色相皆入空明南宗語錄不過如是爰題一
絕於後

一勺曹溪冷欲冰一瓢一笠一枯藤郵亭莫報乘軒使身

夢林詩集卷之二
是人閒行脚僧

畱別錢瑾巖二首

萬里何期得素交相逢晚晚別離遙文人失職多依幕倦
客傷春乍聽簫浮白重爲十日飲俚紅親待四絃調歸鞭
指處君應羨隱隱煙波廿四橋

鄉心已逐水雲飛爲爾回頭溯夕暉鴻爪雪泥原不記鶯
聲春谷惜相違平生知己飄萍散此去懷人落葉稀便欲
埋名荷蓑笠君來何處訪漁磯

陶經歷母守節詩次商寶意前輩韻

涇渭本合流沙金或同鍊貞婦似貞臣見節在遭變有子
託一官辛苦表前善揚芬商守詩商徵信願君傳願寄語

采風人母忘編淑媛

子頴爲余寫山水幀作歌

秋風蕭颯白晝昏滿堂飛動煙雲痕朱君奇氣不可遏禿
華一掃千嶙峋枯藤老樹凍欲坼有似臞仙拱而立却愁
風雨橫空來咫尺蛟龍起青壁空江漠漠遠天黑帆檣欲
過轉欹側誰家避世古柴門深鎖幽篁斷行跡嗟君一筆
千鈞力他人萬本摹不得由來善畫家有傳鳳雛驥子異

毛翮

子頴先大夫諱倫瀚以詩畫供奉

內廷

憶君報最朝

天時

詔君拂

素追前徽中官特給尙方紙淋漓潑墨鋪丹墀君之鬚髯
長而奇畫成上奏 天顏怡更 命掀髯當殿庶賜對不

覺花磚移顧我承明叨侍從樗材畱滯蠻烟重因君作畫

念觚稜江湖水深縈遠夢

李素誠命家姬出見

歸心日夜念菰蒲老去生涯但五湖特許藍橋見傾國李
侯重我過髯蘇

嵩明遊海潮寺却寄朱子穎司馬并田汝載孝廉

陸正揆秀才

憶余之任時經茲雨初霽泥濘赴官程清景難少憩今余
罷郡來潑眼朝光媚杖策一登臨鬚鬢上寒翠居官有何
樂文繡與甘脆試從過後思索莫乏真味余本江海人流
浪不諧世山水及友朋此外非所嗜平生姚姬傳與朱子穎交
親誼尤摯飄蕭大一方萬里每縈繫朱君忽奉檄躍馬翩

翩至相逢昆池濱握手疑夢寐閒關走戎馬歡會偶然遂
失官得故人憑誰較盈匱分知難常聚聊展夙昔契絲竹
豪以哀痛飲不成醉霜華板橋驛豈古陽關地野樹搖寒
光落月照分秋亦有滇兩生謂汝戰正揆依依墮別淚冥鴻去
寥廓泥印那復記唯辦兩芒屨佳處興輒寄海色交林輝
空明滌塵穢旅行得此境獨享心用愧緘詩付郵筒匆匆
詞不備應憐欲歸客回首孤雲際

清溪洞

千仞誰削成雲虛駕飛鞚獨樹不逢僧日暮清溪洞

出滇境

主恩已許住三年不用臨風怨左遷古戍蕭條黃隱霧遙

山突兀碧攬天依人魚鳥猶相識老我輪蹄得暫捐尙有
據鞍回首處未看磨石勒燕然

觀燒用東坡韻

仲冬萬寶成預事籌耕耘欲令土脈厚先爲燎原焚初看
微燄起遠烟裊青氲稍聽響飛爆旋訝騰狂氛千點建標
霞萬朶夾日雲翔鳥尙驚落何況猿與麀滇黔昔荒怪土
石羅魍魎元化所沾濡瘴露澄清芬如何水草際撲緣起
飛蚊安得付一炬坐靖妖狐軍上公督貔貅遠馭庶庶幘
丁壯負弩矢耕鑿多荆裾唯祈畀有年民力庶可分刀耕
而火種三載飽見聞猶憶始行部農舍畱使君不知野燒
發夜半驚晨曉繼橫星月走赫奕旌旗紛須臾猛烈銷青

天但縠紋方當治場圃藝植落秋蕢老農如可學便與長沮羣

黔中雨

前夜顛風送客今朝細雨迎人前出滇境而風今入黔境而雨諺云雲南風貴州雨
信不誣也三載蠻荒滋味他時回首傷神

庚戌橋

我本庚戌人來往庚戌橋橋邊老樹已黛色鬢絲那不臨風雕却看流水流不已復有行人似流水青天不動山嵯峨見恆河性夫如何

老鷹崖喜晴

亂山粗醜如鬼面一峯纔過數峯見老鷹何處掠長空瘦

骨稜稜脫鞵鋌人言黔無三日晴此地幽崖雨常濺每當
卓午尙昏黑却恐盛夏猶氷霰直從雲外絕深井細路崎
嶇盤一線何須失跌始悽惶俯視未週神已顫造物似憐
歸客窮特放金烏林杪絢宿霧霏霏遠村散夕陽冉冉微
風善山腰路轉互蔽虧閃鑠飛鴉背如練行人信步扶短
筇飽看一幅倪黃絹

西林渡

山豁天門開水寒沙跡露萬里一歸人晚喚西林渡

黔東雜吟四首

廉纖韓偓詩中雨朦朧元暉畫裏山判取風餐三十日歸
田容我占清閒

自雲南至鎮遠
陸行約三十日

澗領鬢沙短髮垂苗人日暮散墟遲兒童拍手爭來看却
把蘆笙隔箏吹

至人默坐失今古下士多言分有無洞口雲深夜無月坡

句請君何處覓牟珠

牟珠洞在貴定縣西

霸子鴻妻布褐衣早梅花下叩巖扉

時飛雲洞早梅已開

白雲見我

休相笑君待飛時我已歸

自滇南歸聞畢秋帆同年授秦鞏觀察

故人三載惜分襟忽見除書得好音客髯白從金齒返牙

旗紅映玉關深登瀛門外春遊日聽雨樓頭夜話心

聽雨樓秋

帆都門寓館也同甲三人俱外授應增典故在詞林

木稼

陰晦苦連旬嚴寒潛入夜朝來看木杪集霰多於稼重露
垂穎栗輕風搖穉稭黃同五里迷白異六花蛇紛紛蘆葦
亂獵獵苞茆藉丁冬玉互鏗絡索珠相亞何時期刈獲伊
誰事犁耜休看萬粒圓會待千林謝天心有生殺物態倏
更化幸余非達官見此毋庸怕

芷江道中

一條寒玉瀉千岑兩槳輕飛似浴禽臥月不嫌舟局促下
灘漸愛水寬深回看熒詔蠻烟遠遙指荆吳暮靄沈謾道
五溪曾貼墮歸人強半慰鄉心

辰州舟中度歲

退歸真學舊桃符歲暮空江一棹孤雪好更宜晴後看山

遙却映水痕無頻年官牘催晨夜此夕漁舟到畫圖休笑
天涯成濩落庖廩猶得其妻孥

再過桃源縣

自是紅塵客太忙桃源未必盡荒唐卽看流水琅玕色尙
覺空林草露香黔蜀殘山從此斷黔蜀萬山叢簇入楚南
猶相屬不絕至桃源始
有平遠之觀矣羲皇化日至今長年來粗會陶潛意歸去扁舟問
醉鄉

過楚南不得諸申之同年消息

離別知關命艱難近若何無從問消息誰與慰蹉跎賦草
春雲在騷經暮雨多托根曾上苑終是近 恩波

初至洞庭

扁舟遙下武陵南，明月隨人到枕函。
却望粘天春水碧，行人今挂洞庭帆。

洞庭湖食魚

蠻徼滯三載，每嗟食無魚。
扁舟得南下，復此親菰蘆。
愛月未能寢，蓬窗夜聞漁。
蓬之近船，買髻鬣猶昨，盱汲水自煎。
烹芳香達座，隅芼以負簪。
筍佐以帶露蔬，素鱗照紅燭。
金光射清醑，借問指酪人。
頗曾見此無，亦有玉盤脩。
萬錢辦官廚，華筵雜厚味。
便覺風韻殊，何如江湖上。
快意脫檢拘，傾杯氣磊落。
下箸神敷腴，爛漫成一醉。
鼓腹還歌呼，吾生真爲口甯復知其餘。

洞庭湖阻風

一夜陽侯忽放顛，居然軒樂奏繁絃。
阻風中酒饒閒味，憶事懷人觸舊緣。
故國關情江派接，新寒入夢雨聲懸。
湖心三宿殊非惡，飽看煙波萬里天。

登岳陽樓

春風送潮歸江流，客行暮繫巴陵舟。
久聞岳陽今始到，雉城雲擁三層樓。
面臨洞庭幾千頃，水光盡日依樓頭。
杜陵好奇未觀海，到此已嘆乾坤浮。
我來春漲猶未起，沙痕半露芳草洲。
若使高秋嶽派滙，粘天汗漫安可收。
估船數點小於豆，君山一髮漂如漚。
魚龍起伏風雨至，羣靈恟恍交星旂。
昨向湖心三信宿，狂飈捲浪吼萬牛。
令我咫尺迷向背，遠天渺渺增旅愁。
因憶昔年浮海役，孤煙滅沒看齊州。

三更日湧赤雲爛五夜火然黑水幽蒲帆九葉蔽天地大
魚一脊橫山邱嗚呼世間奇境曷有極恨不乘風御氣逍
遙遊

安南國貢使阮輝儼登岳陽樓有句云霧借山光
吞去鳥客從鏡上數歸漁頗覺新雋阮安南探花
也

澹雲微雨朝鮮使去鳥歸漁交趾才我是中朝舊供奉江
湖白髮首重廻

坐岳陽樓贈嚴道士

萬頃春聲捲浪花孤舟晚泊天之涯岳陽道人無箇事洞
庭水試君山茶

赤壁二首

臨江千仞斷霞紅
檣櫓依稀在眼中
不是三分開蜀帝
誰能一戰走曹公
沈戈折戟荒苔沒
亂石驚濤故壘空
苦爲荊州忘漢寇
思量呂陸漫英雄

江潮袞袞來荆益
官柳青青接武昌
年少登壇人似玉
天涯懷古髩如霜
銷沉霸業畱山色
歷亂征帆背夕陽
千載三分多俊傑
風流吾獨愛周郎

黃鶴樓

江漢交流地荆吳
四望通雲濤來足
下樓閣出空中
鸚鵡千秋恨梅花一笛風
病歸殊遠謫未肯怨飄蓬

過黃州懷東坡先生

東坡先生謫黃州到處嬉遊成樂土勝賞輒與季常俱佳
節遙同子由數禪僧道士偕臥起村嫗田夫相爾汝筍香
魚美固稱快葦濕庖空亦無忤出處規模擬樂天文章格
律追工部我想昔人胸次間浩然直與造物伍古今上下
隨雲烟貴賤窮通一寒暑並未思量身後名況復計較腰
間組豈云遷逐反便美須信升沉無樂苦暮年海外益孤
冷却向蠻荒啓蠶繭戲論猶堪百世師寓公翻作名山主
我尋墜緒惜生晚幸讀遺文如面語適從戎馬抽身來過
此徘徊不能去

琵琶亭

當年楓葉與蘆花秋遠江空月欲斜未必琵琶堪下淚江

州終未慣天涯

彭澤三首

紛紛仕宦場豈乏田園興因循過歲月美志多未竟五斗
不折腰力猛由識定飄然歸去來尋我舊三徑霜髯倚東
籬雅興黃花稱

一日遇便風三日苦暎逆人事類皆然迫促正何益今朝
風忽利指顧過彭澤城邑枕江山佳處亦可宅頗怪五柳
人棄此如敝席定知寄意深督郵豈足責古人樂栖遁非
作高騫客耕桑隨世緣去住從吾適後人不可及強欲擬
遺跡借問桃花源伊誰溯空碧

人愛陶令逸我知陶令豪易水詠荆軻寒風暮蕭蕭垂天

有奇翮豈在騰扶搖寂寞老柴桑甘令光彩韜古來世外
人經濟乃更饒商綺息漢爭魯連解齊囂功成長揖去雲
臥青山高

小孤山

一夜潯陽風信好五更客舫抽帆早詩人睡足啓篷窗宛
轉烟鬟媚清曉西江小孤接大孤孤標謂與羣峯殊誰將
脂粉澆青峭無端幻出水肌膚巫娥湘女俱姝絕何必神
明皆猛烈靈旗出沒御罡風仙珮依稀響秋月離騷芳草
千古心溪繁欲薦江流深天晴風利不得泊背指蕭蕭萬
竹陰

登皖城樓

無限興亡事斜陽登古城天低春草色風捲暮江聲牛渚
波光接皖公山影橫來朝下建業惆悵近清明

舟中望九華山

我行三閱月始見江南山相逢真故舊一曲開塵顏迴峯
籠澹靄略見蛾眉彎不知有何好令我忘晨餐薄晚更清
快夕陽千頃寬青青九子峯落我篷窗間空翠逐歸鳥晴
暉相與還未須貯壺中秀色宜遙看長吟復東去煙霧隨
漁竿

舟夜

旅客三更夜空江萬里天水涵星不動帆正月同懸遠樹
攢春薺平蕪入曉煙近鄉無限意倚棹未能眠

月夜過牛渚不得登太白樓

天寶謫仙人住世如游空
朝登宮闕紫雲上暮宿江湖碧
靄中錦袍烏帽一吟嘯迢然鸞鳳鳴
天風人閒不見空千載尙有山川似
相待牛渚西江明月天清輝蕩漾寬
如海海水不可極仙人豈可識却因扶
醉賦清平誤使姓名留史冊卽今江
上起高樓婦孺皆知誇勝遊夜深空
過上不得回首煙波天盡頭

夢樓詩集卷十一

丹徒王文治禹卿

柿葉山房集

余歸里後卜居夢溪之旁壽邱山之麓有柿樹大可
數拱葉繁陰茂構小齋其下日夕吟咏以爲娛古今
體詩一百三首

一草亭小集次雅堂韻

桐陰如夢乍晴天初夏憑欄似小年萬里歸人重道故三
春花事尙餘鮮林泉老去纔知味櫻筍南來不計錢壁上
尋題却增感吟情無復舊時妍

章二梧同年自吳門入都維舟過訪并出余壬午
歲所書蘇軾行詩幅見示蓋已裝池成帙兼命善

畫者補圖余於詩與書皆不工何二樞偏嗜至此
聊綴一詩卷末以誌年月云

山如前度碧鬢改昔年青三載不相見孤舟復此停來禽
慚短翰去馬望長亭幸謝金門友漁竿在遠汀

有香草堂小集送鮑雅堂舍人入都

一角西山在柳梢朱闌干外綠陰交告歸勝賞斯爲最惜
別深卮莫易拋才子聲名初出谷老人事業但誅荊紅梨
館裏丹霄路休對泥痕憶舊巢

再別雅堂

投紱歸來萬里遙名心自笑未全消玉堂手自栽花處尙
欲煩君護舊條

手把寒山一短筇爲君指點五雲濃
會須粗了人間事來聽僧樓半夜鐘

病

綠陰蕭寂鳥無聲莫怪空堂病易成
昨向江頭送行客望中煙水太寒生

題贈李道士紫書李是趙桐門弟子

桐門古仙客五岳臥高樓山翠眉閒落
江聲枕上流傳衣有高弟把袂揖浮邱
日暮采芝返泠泠玉露秋

題石公山人松寥小隱遺像山人姓萬名涵字少

滄吾郡能詩者也

昔賢人與骨俱朽至今祇有文字傳
其閒窮達亦何較早

逐塵却飛雲煙石公山人不偶世吟詩頽放窮山巔由來
卿自不求仕非關聖代遺此賢所惜飢驅晚逾窘買山
而隱終無錢生綃寫照豈無意松寥拳石江吞天若教江
水變春酒拍浮碧浪寧非仙幽林儼作莊士立遠岫澹學
蛾睂娟山人住山願未遂聊借圖畫償清緣白公屏風蘇
笠屐好事遙仿非真詮何如此畫自摹繪曲盡毫髮無嫌
妍世人貴耳賤目前山人哦詩空萬篇此畫千金購不得
但須少待五百年

題潘蓮巢畫卷

六朝煙樹接寒汀山到金陵不斷青却望海門天盡處數
帆如豆雨冥冥

題魯南莊如圃灌花圖二首魯故滇中縣令也

明府風流似潘岳閒居未遣二毛侵却將滿縣栽花意一
寓輕輿色養心紫萼紅桴春露重籬門苔逕暮煙深不緣
多病歸農圃此樂憑君底處尋

頻年髀肉慣征鞍羽檄窮邊五夜寒鄉樹但於歸夢見蠻
花多傍戰場殘眼中卉木榮枯易天外兵戈去住難早晚
饒笳歌杕杜與君日日舉頭看

菱湖采菱曲二首

菱湖似明鏡空水相搖漾清夜泛舟歸遙聞采菱唱
采菱湖水邊湖水碧於天關心湖上月昨夜十分圓

畫石

一石嵌空如腐槎一石偏頗如削瓜一石皺如春水縠一
石幻如秋天霞一石離奇連復斷如雲漏月不平聲依華平
生足跡半中外胸中萬峯紛偉怪每逢奇賞不能摹自恨
當年未工畫奔波萬里誠苦辛歸臥一邱老此身圖中小
石轉可戀磊磊落落如畸人

熊滌齋先生秋江獨釣圖

畫圖剪取吳淞水眼底煙波幾千里漁舟一葉似瓜皮意
釣空鉤豈魴鯉亦不願磻溪夢卜感非熊亦不學桐廬五
月大澤中興來偶把秋筠節坐看遠山潑翠濃唯公早直
承明裏笑謝華簪如脫屣前身原是地行仙任人呼作天
隨子卽今九十猶善飯著書等身身愈健豈無俗士款松

關路隔桃花尋不見秋來明月正高寒江水遙連西塞山
便欲隨公入圖畫放歌煙靄空明間

渡江口號

江心何處送天風吹到金山寺裏鐘正是遶臆初睡覺迎
眸千仞削芙蓉

平山堂送別雷雷峯兼柬芷塘二首

一帆遙下錦城來萬里秋風共此杯社燕霜鴻紛聚散前
塵今雨兩縈迴碧峯晴趁秋光遠黃菊寒依夕照開此去
朝天須及早迎春帖子待親裁

月轉林梢酒再巡更深絮語倍情真揚州夢醒瓊花落玉
鏡人歸蒜髮新時雷峯新喪姬人別後眠餐宜努力中年哀樂莫

傷神長安若見同心友剪燭重將此意論

秋杪寄懷京師一二故人

雁聲過處酒醒時俯仰生平有所思盡望可能忘惠子彈
琴難得對鍾期秋霜入鏡差嫌早昨歲抽簪已較遲久辦
空山刷黃獨雲蹤尙欲遣君知

題常西北道裘小像

烏絲月下寫銀鈎紅袖圍香未白頭近日閒情都懺悔道
家裘束也風流

雪後汪茹梅公子招集署齋卽席戲贈

曾讀東坡白戰篇故將縟語點清妍
統裁花卉粧屏障玉界樓臺出海天
座有華簪俱玳瑁燈廻秋水是神仙
夜深

莫度銷魂曲，聞說鍾情損少年。

戊子除夕

十年脚踏九衢塵，三載腸迴六詔春。
車馬勞勞頻聽漏，風煙漠漠每懷人。
歲時祇覺鄉園慣，情話無如親戚真。
髣几磁盆銀燭下，水仙花影倍精神。

入春

入春纔四日，已覺春風暄。
被酒晨不起，至午猶欲眠。
似聞細雨聲，微洒紅窗前。
起看花枝上，的皪明珠圓。
誰言山中居，窮陋無與妍。
卽此頗富貴，不在持萬錢。
更欲待晴霽，攜杖春山巔。
縱目飛鳥外，浩蕩看江天。
吾志在閒適，因之懷古賢。

喜錢瑾巖見訪卽同至焦山探梅止宿山中夜話

有作二首

梅花如雪夜如年萬里心知忽眼前乍得舉杯明月地不
禁回首瘴雲天夢中關塞猶橫笛枕下滄江聽扣舷多謝
漁磯尋舊約此生唯有看山緣

歡會從來易別離昆明往事繫人思薔薇露重金卮滿優
鉢香清玉漏遲月裏霓裳原恍惚雲中朱字尙猜疑空門
一夜聽鐘臥又爲梅花訂後期

爲鮑根堂題水木清華圖

據石聽虛籟臨流數落英竹香春雨滑槐夢午風清東澗
白居易西園王晉卿只從圖畫看令我欲遺名

烈女詩爲家仲姑作

吾本節母孫慈顏猶及覩
攜我話悲辛老淚續如縷
自從失所天食貧備諸苦
績麻手屢龜汲井腰頻偃
桂薪剪髮貰蘿屋賣珠補葛衣
霜前縫菜把雨中煮白日疾復遲
青燈燼還吐定力閱升沈
貞心耐寒暑凜凜冰蘖姿
堂堂女士譜願我學術疎兼之才
質魯家風有清白世德愧揚詡
今聞仲姑事烈性更如許
絃絕響逾清蘭煎香不腐
捐生已非易況乃得死所
寧惟光吾宗直欲邁前古
若生吾畏友立傳亟褒與
從來闡幽微隻字嚴衮斧
苦節發高文金石爲酸楚
讀之觸予哀淚濕秋墳土

邱玉卿見訪

自余謝病歸拂衣擬高臥悔未入山深高軒時復過披衣
迎熱客未出意先情不如逢窮交一笑愁顏破廿年紛聚
散世事如轉磨豈復念酸辛誰能惜摧挫南行山嶺确北
走塵堀堞當年冰玉貌半被霜華涴江頭殘雨歇新綠正
婀娜一樽聊道故落日班荆坐酒酣倚長劍莫厭金巵大
來朝一葉舟棹聲何處和

題友人春草閒房

春草如波綠春風似剪輕經時深院閉隨意上階生點易
研晨露哦詩對晚晴自然人跡少不用更逃名

次韻題黃鶴山莊四首

何處尋幽墅蒼蒼萬竹中柴扉人外掩春水路旁通樹密

常疑雨窗虛恰受風晚來霞色起高咏憶興公

碧梧栽未久已復見孫枝露滴紅檐曉陰移白晝遲臨流
彈綠綺倚檻寫烏絲偶占清閒福人閒莫遣知

南山漸深處石磴入雲長古墓襄陽米荒祠相里張

故相張文

貞公祠寺鐘晨到枕蘿月夜窺牀忽覺烟霏合林巒十里蒼
鬱鬱殘花事匆匆過麥秋薄寒蠶婦怨積雨老農愁乍霽
欣啼鳥微暄聽叱牛漫膚常畏暑擬此十旬畱

著履圖

自有江山助勝情詩才真似謝家清邨居不識尙書履只
愛空階聽屐聲

賞雨卯屋圖

逸少快晴曾作帖司空賞雨更評詩
檐前幾箇新梧葉畱取三更獨坐時

荷池晚坐

荷葉淨如拭荷花香更清
自然滌煩暑不待涼風生
白鷺去無跡紅芳墮有聲
因看遠波色正與暮雲平

秋夜竹下

何處清風至璆然送玉聲
低頭看月地竹影正縱橫
天外涼初到人閒序易更誰家
好長夜望遠迴含情

贈茅師艾

與君同舉秀才時君方白皙我無髭
憐君性苦愛音律彈絲品竹靡不爲
有香草堂開春讌梨園小部羅釵鈿
主人

三爵玉顏頰自按紅牙度黃絹憶余海外乍生還提携筇
竹游故山雙峯頂上忽握手爲吹玉笛開塵顏是時月光
如白晝萬頃銀濤捲襟袖入破一聲雲不流竊聽蛟龍咸
頰首沈吟此事幾春秋綺席相看竝白頭哀樂中年原易
感江山今古豈無愁君家黃金高斗岳偶然揮盡成蕭索
清秋客散孟嘗門正值空庭黃葉落却喜佳兒頭角出謂
亭賦才堪料班揚敵梧噦休誇老鳳聲桃花爭羨汗駒色
君家有子事應足我亦休官臥林麓會須閒暇數相過濁
酒一杯歌一曲歌詞試唱大江東鏤板鳴弦意自雄少年
俠氣小湖海未肯變滅隨東風

題友人南唐雜事詩後

南唐半壁支江東。皖公不落御酒中。靈槎老鶴徒鬱鬱。紫袍金貢何匆匆。風流偏有承平意。錦洞天中花滿砌。可憐後主好才華。小令吟成撥燈字。宮中誰最擅嬌嬈。周家姊妹雙翠翹。雲篆香焚獅子鼎。霓裳曲疊鳳凰槽。復有窈窕常近御。新月纖纖趺雙屐。素齊宮蓮步。肯輕來漢殿。霞裾恐飛去。忽傳戰艦橫江開。浮梁千尺爭喧豗。四百餘年舊家國。瓊枝一夕成蒿萊。月明故國重廻首。往事沉思復何有。一夜東風入小樓。傷心唯剩江南柳。吳苑才人鑑古精。新詞逸事譜分明。閨運興亡何足較。官家難得解多情。自從鐵筋潛謀日。直到牽機終七夕。飄蕭金粉拾遺灰。零落宮商按幾拍。長江落日倚闌干。我亦因之老淚潛。雞塞夢回

聞細雨莫教低唱念家山

首春雪霽邀諸同人柿葉山房小集會者爲鮑雅
堂舍人李琴夫黃月波兩上舍茅耕亭秀才趙桐
門道士黃石屏符拓菴潘握篲三布衣暨余爲九

人二首

臘後見三白入春剛喜晴深卮松葉暖殘雪竹窗明舊侶
重雲合新詞振玉聲雞豚小鄉社不用擬耆英

未厭山居樂偏憐野興同菜餘人日脆燈借上元紅

時正
月十

日飲少難辭醉吟成那計工頽唐雙蒜鬢慚愧上屏風

是
日

握篲圖會中
九人於冊

花朝鮑根堂招同黃月波趙桐門集練光樓

東坡全集卷二
江外晴煙欲染衣江頭風物漸芳菲樓空不礙春雲過帆
下剛同暮鳥歸低檻梅花香入酒插天山色翠當扉故人
甘載睽言笑重把金卮對落暉

攬秀閣月夜看梅花三首

少小登臨處重來思不禁梅花與春月脈脈故人心
朱欄寂寂春素幌迢迢夜江寒月漸移久立梅花下
露氣淨於洗清暉乍有無臨風千點玉翻覺月模糊

吳中顧星橋見訪同飲江上練光樓樓乃星橋十
年前止宿地也星橋卽席成詩次其韻

偶借春光一倚樓却令詞客感前遊十年殘夢俱鴻爪萬
里歸人乍白頭流水無情還惜別名山有酒且銷愁臨江

多少閒雲住底用高飛到十洲

黃琮再招同人集攬秀閣二首

黃琮月波之從子而亡友璞山之遺孤也璞山下
世垂十年余羈宦四方音塵間濶今其子已弱冠
頗能親禮父執續當年文酒之會酒酣與月波話
舊卽席成詩

十日尊前此放歌玉梅花影正婆娑宵寒如水知春淺江
濶於天得月多轉眼繁英蒼蘚積回頭往事白雲過故交
有子俱成立莫怪勞人鬢易皤

月斜江閣把深卮話到當年痛飲時醉拉袈裟翻綠酒
人源上笑扶條脫傲烏絲妓樓花謝金鑲閉僧院棋殘玉局

移獨有傷心杜薇省茶烟禪榻自沉思

食河豚

南人食品便水族魚餐竟欲副稻梁河豚二月味尤美購價不惜千錢昂吾家大江西北楚天下注波洋洋琉璃

一碧直到海春洲春岼羅其旁漁師舉網及春早採鮮肯

待花飛楊

河豚過清明便不可食宛陵以春岼飛楊花爲河豚之時誤矣

今朝睡起食指

動主人招我高筵張膨脝巨腹口喁噉顛倒枕簪盈傾筐

便就江流痛洗漑爬剔不殫手爪僵旋教剝膚兼伐髓繼

乃抉眼還剝腸就中藏血去務盡不使纖芥畱膏肓金齏

精潔火候熟芼以筍芽和以薑晚來佳醞共斟酌白磁盃

貯醢醢漿豈惟乳液北西子風味竟體皆施嬌或言茲饌

性有毒中之乃至身命戕胡爲七尺不自貴輒以飲噉輕
垂堂古來至美有至惡豈唯口腹宜周防治之有道逆者
順庖丁原不更刃鉋口爽若受老子戒須裂錦繡投笙簧
百年枯坐亦無謂不如隨俗聊相羊矧余半世作羈旅食
單往往缺鯉魴老饕一飽且勿論愛茲風物真故鄉酒酣
更詠李生句殘梅墮紅月挂牆

李琴夫有紅梅花下
洗河豚句爲時所稱

焦山水晶菴題故相張文貞公手跡二首

吾邑故相張文貞公手跡大小共六十三字幅長
三尺廣二尺書公自作遊西山詩藏於焦山之水
晶菴公故不以書名而茲幅字畫古媚神采奕然
爲後學日夕臨池者所不能及乃知前輩於書法

夢才言集卷二
一道未有不留意者歲久僧貧將就殘失友人鮑
根堂爲之重裝予爲詩綴其後卽用公所書詩韻
并示山僧知所珍惜焉

波光連海嶠林翠接山巔愛此水晶域凜然冰雪懸猊雄
蹲大石鷹細掠秋天墨瀋猶新在人間已百年
當日論聲價蓬萊直到巔青山謝安石紫禁柳誠懸寂寂
初禪地茫茫浩劫天但須留禊帖應記永和年

潘握筠山水

仲晦詩中雨元暉畫裏山三篙流碧玉一角露烟鬟之子
足幽興無人常掩關盈堦書帶草當路不須刪

家文園給諫巡視南漕見過話舊文園余同年進

士也

三月鶯花尙未殘故人持節款江干
老來愈覺同年重別
久方知見面難鄉曲羣兒驚豸服
春明往事話漁竿大羅
天上霓裳詠剛是人間一指彈

吳中訪顧星橋止宿月滿樓時星橋將入都門卽
以誌別二首

扁舟一直到門前門外青青樹影圓
佳句千篇霞散綺高
樓百尺月當天重尋前度鶯花約
好結多生翰墨緣夜靜
西牕同剪燭筠簾深下露娟娟

正擬都門作壯遊維駒爲我暫遲留
巨觥滿壓春娘酒小
海低迎夏統舟趙北燕南新驛路
柯亭劉井舊瀛洲煙霄

件侶應相憶爲報清江有釣鉤

彭芝庭先生招飲并贈詩次韻奉答

七年不到吳中市夢裏林巒披錦綺昨朝小艇婁門東曉
漲涵青暮煙紫急流勇退寧非艱先生故林欣早還幅巾
登堂一下拜朗朗照人冰雪顏風塵久別良師友那易論
文共樽酒曲水時晴開藥欄幽篁夕照安茶臼況是天涯
逢故人時諸桐嶼同年枉座蘭旌初返湘沅春人生惟閒不可買清
風皓月抵萬緡

題家條山黛仙詞後戲柬星橋

黛仙星橋姬人也

春風鬢影對鳴琴翠黛遙山半淺深賦草仙郎裁已就早
潮多恐負香衾

梅花村

鄧尉孤山總莫論
梅花隨意便成村
春風千本濃於雪
淡月昏黃欲到門

題西莊前輩丈室散花圖三首

鬢華樓閣散天花
天女多情髣髴鴉
合是維摩老居士
眾香國裏領仙娃

迦陵啼鳥應宮商
不獨風香雨亦香
會得文殊微妙旨
任他著袂亦何妨

曉起湘簾深復深
瓊窗鏡檻倚花陰
唐詩萬首朱唇誦
便是華嚴法界心

放鶴圖

海鶴有遠心寥寥白雲表臨風一長鳴清響落林杪偉哉
此胎禽託性異凡鳥乘軒非夙願開籠愜遐抱況乃千樹
梅繁葩月同皎高懷憶支公幽寄近遭老夜深涼露下寂
歷柴門悄

題吳竹嶼同年所藏仇十洲摹倪高士寫真卷

實父寫倪元鎮像文壽承書墓銘其上明四家畫
惟實父爲難辨生平所見穠俗者弗具論卽可觀
者不下數十種亦贗筆也此幅筆法與世所傳仇
畫迥異而秀淡古質之致出於天然矧壽承書神
采奕奕是其極用意筆畫與書爲一紙書旣真畫
豈能僞余之鑒畫不及鑒書蓋非自能畫故甘苦

親嘗處終嫌擔板往往借書家之徑而曲通之此
類是也竹嶼同年博而善鑒余至吳門主於其家
因獲觀焉而紀以詩

雲林古高士栖遁和天真畫以掩其詩詩以掩其人其人
今不見風期宛如桴披圖省遺範相看欲忘言竹嶼亦靜
者樂志臥邱樊啓牖納竹翠開池延月痕蕭蕭清閼閣夷
使猶知尊遐躅在人間千載等朝昏林泉結夙契此圖合
歸君君復有達識過眼同烟雲

余至吳門吳竹嶼同年邀寓話雨亭適程魚門舍
人自揚州至連榻兼旬晝則接跡出遊夜則剪燭
道故自余辭春明門不獲此樂久矣爰與魚門竹

嶼各賦五言六章以紀之

萬里歸來客輕舟訪故人碧雲如隔世紅雨尙殘春樓小
剛容榻池寬却受綸殷勤雞黍意少住已兼旬

程髯天下士別緒七年中官被吟詩折金綠結客空合并
良不易遊賞每教同勝絕西山路籃輿樹影籠

寒山千尺雪武阜一聲鐘石倚定僧瘦花迎遊女濃斜照
樓閣迥細雨薜蘿封便擬扁舟去鴟夷訪舊踪

珠履嘉賓集銀燈綺宴張人疑花作骨笙是玉爲牀夜靜
宮商正風輕環珮香觥籌高會罷一院月如霜

有時不出戶竟日快論文金石披蟲鳥丹青展樹雲庭寒
微有露花暖乍添芬那望烟霄友因之感離羣

屢欲解維去，留連更極歡。主人情太重，我輩聚原難。話雨邀題榜，竹嶼構亭未有名，因余與魚門會寓乃勝。曰話雨，余爲書之。何時再倚闌。加餐同努力，珍重鬢絲殘。

首夏集鮑雅堂舍人論山詩館咏階前新綠

主人謝薇省，暫爾臥衡廬。綠草相如宅，青蒿仲蔚居。痕輕緣砌上，陰淡補窗虛。松逕不常啓，應知屐印疎。

傷趙桐門羽士二首

瓢笠相期廿載餘，此生終擬混樵漁。星邊大石邀行酒，枕下滄江借讀書。蕭散予纔盟野鷺，蒼茫君忽跨鯨魚。黃寧欲向求真訣，月落瑤壇花影疎。

海內交遊誰舊雨，故鄉知愛漸晨星。病餘衰髮增新白，人

比秋山帶古青黃素仍留義和帖

師善書

元宮未勒少霞銘

玉皇閣重葺未成師之遺恨也

仙家亦有無期別望斷遼陽白鶴翎

阮丈東岑招同鮑論山集春草堂用憶焦山新綠

舊韻

出守署辭芸還家衣製薜壯心與鬢殘離思隨年積龐參
老詩叟新吟又成帙吟餘仍自寫璽紙蠅頭密寵辱兩無
驚風雨皆不出當年聯咏處幾見春草碧學憐短檠棄古
待脩綆汲林泉開始尊歲月老逾疾深卮對故人風味猶
夙昔新綠盈山中永懷古高逸

爲郡守錢南浦題溪山覓句圖

恩共璽書來日下春隨麾蓋駐江關政聲衛颯任延上

詩品開元大歷間自有清香凝宴寢未妨雅興寄溪山圖
中竹樹青於染疑對棠陰十畝閑

題李桐階秋林琴韻圖效韋蘇州體二首

秋泉日澄澈秋樹時蕭森微風一以振空際鏘璆琳伊人
眷幽賞徙倚茆堂陰不須撫綠綺自奏太古心
舉世箏笛耳紛紛各爲誰道無聲中默與牙期遇魚戲
戀清波鴉歸選深樹無客款柴荆黃葉遮來路

符生石印歌

我少有癖耽古文泰書汗簡窮皇墳鳥魚蝌蚪龜龍雲
之寸石衆妙紛輕如微颺蕩穀紋淥淨難唾波沕沕重如
鏗鐘扣鼓鼗又如項籍扛千斤雄如萬馬踏勁軍秀如皎

月逗秋雯莊如列仙鸞鶴羣星冠羽帔朝元君逸如高士
臥夕暝空山無人風露芬根抵漢氏同榆枌涉獵周秦合
復分爲之十年用力勤雕蟲小技徒云云邇來斑鬢漸似
銀眼中難字嫌紛紜有手祇愛植杖芸符生學我意頗殷
鐫劖入骨盤細筋嚴寒不畏指爪皸溽暑亦不畏蠅蚊磊
砢百石意所欣自調丹砂爛若焚高齋默賞香微醞技近
乎道遊無垠何人斗大誇功勲車聲如雷吾不聞

友人有以出山勸者詩以答之

青鞋布襪儘清狂故土三年藜莧香誓墓原非爲懷祖彈
冠何必逐王陽卽看僕從衣糧美却使兒童學業荒若道
蒼生望霖雨自知經世百無長

杭州汪秀峯見訪邀同鮑雅堂遊城南何氏園次

秀峯韻

曰余罷郡歸本愛林泉美閉門意自欣有客情亦喜武林

舊詩壇卅載佩蘭芷

秀峯與厲太鴻輩同西湖詩社今將三十年矣維舟忽見詣

朝臥慵乍起因之游興濃南園訪紅紫桐疎陰更清荷敗
波猶綺一樽雖簡略跌宕論文史日落念分攜悵悵何能
已

題畫

朦朧煙林雨荒寒邨舍秋空江連暝色何處有孤舟

松石間小集

有序

予屏跡空江已逾三載睠言故友多在四方鄉里

舊遊嘆晨星之易散歲時歡聚惜佳日之難逢李
君桐階家有幽棲人能好事置酒琴書之畔分題
松石之間虬髯千縷雨漬銅青龍宮一拳星涌蛾
綠矧乃晚烟初斂秋氣方澄螢流清影冉冉雲屏
桂浥古香沉沉天幕歐陽公之倡和時雜歌諧王
右軍之禊游或兼絲竹詩成各體作者七人古來
勝賞豈異今時他日相思毋忘此夕

故人新從白下來一尊相對桂花開座間松石能清瘦容
我秋衣藉綠苔

八月廿四日再集攬秀閣同李琴夫茅耕亭潘握
簣黃石屏

閨居亦有小離別重聚還饒新意思當檻州深鷗睡處隔
江沙露雁來時山空略借秋皴染日淡從教樹蔽虧轉眼
黃花應可採清寒風味更相期

蔣香涇蕉林洗硯圖

美人之鏡壯士劍名士由來亦愛硯多生和習難盡消日
三摩娑未曾倦端州紫玉膩且勺妃子出冷凝脂新青華
火捺互斑駁鸛鵒炯炯雙瞳人我生作字祇一手稱手之
硯殊難有安能發墨不損筆與我周旋爲老友蕉林晝涼
綠蔽天羨君默坐心悠然呼童洗罷著棐几試潑醉墨撫
張顛

登舟

入山苦不深，敝廬寄城市。雖復謝簪纓，人事未能已。偶然買小艇，薄暮溯烟水。延緣葭葦間，便覺風景美。柔櫓劃碧波，戛然中宮徵。回頭望城邑，已在蒼茫裏。會署散人衙，窮年弄清泚。

喜程魚門見過卽送其北行

魚門辭官將有入山之志，而草堂之貲未措，家口仍寄京師，明歲恭值慶典，詔開恩科，中書舍人例得仍試禮闈，故同人多勸其北上。至是成行，吾曹踪跡眞浮萍，別固容易，會亦輕。所悲甄會仍復別，牽衣佇立難爲情。暮春同作吳趨行，平原十日醉不醒。華筵高張，集名伶，柔絲脆竹啼春鶯。世人羅綺逐羶腥，曲中妙

理誰解聽服君何但論千古談宮辨羽亦頗精歸來折別
江之汀後期秋日訂蕪城我以事牽不獲至山堂發桂彫
清馨作書問君君就程傳言君已之燕京忽然剝啄扣扉
荆歎髯一笑翻失驚便須命酒對君酌園蔬小摘猶堪烹
細思十載同承明故人飈散如流星豈因厚祿書斷絕
宦途倥偬吾飽經非君請假辭冠纓安能來去無羈縈與
君出處素志定此別不必重叮嚀君今且去勿回顧聖
朝納策開彤廷

吳中畫舫歌爲黃長汀作

吳中畫舫天下無文窗雕檻青紗幬帆開虎阜千尋玉舫
曳山塘萬斛珠虎阜山塘十里行飄如綠葉墮波輕牙檣

轉處紆新柳，桂楫迴時挂。落英片片飛如雪，吳娃舟裏春愁切。生怕春風去，不迴爲憐春月圓。還缺紅頰元髻，碧玉簪如嚬如笑，兩難禁願爲。梔子同心樹，願作迎陵共命禽。吳中游讌由來盛，酒棹歌船鬪高興。每逢上巳及端陽，士女喧闐肩臂並。別有清樽集勝流，琴心詩意展綢繆。瓊筵乘醉吟千首，翠黛隨波坐兩頭。玲瓏蟾彩通珠箔，磨閃銀燈添錯落。愛聽瀟瀟暮雨聲，故向菰蒲深處泊。黃君閩士寓吳閫，白皙微髭玉立長。傳家卷軸高於屋，結客襟懷皎似霜。後堂小部連珠格，秋水睽光射瑤席。不是周郎顧曲才，誰能消受旗亭畫。春餘雙槳過蘇臺，爲我金罍日。目開身是揚州狂，杜牧當年筵屢遣。紫雲迴榻來逸趣，看逾

好追涼別打蓮花稿

晨汀新作荷風畫舫圖

人似荷花花似人月解

多情天不老
艸童媛女繡羅襦
亭際舟中韻不殊
恐惹龍聽罷吹笛欲邀天
笑試投壺君家艷福真堪羨
花氣衣香渾莫辨
白璧難將風貌摹
黃金較比春宵賤
辭官病守日
頽唐來往吳門一釣航
餘生商確歸休處
還是柔鄉是醉鄉

題徐忠葬封公課孫圖公芳圖先生之父也

讀書志千古
匪與功名期
積厚流自光
理在天弗違
於身於子孫
位置各有宜
先生究墳典
江左推經師
箋注窺康成
紀載方叔皮
懷茲間世寶
詎曰不逢時
谷蘭幽乃芳
璞玉韞更輝
有子紹家學
永冠登金閨
歷試郡縣間
渥澤霑

窮黎旋擢清切地朝英仰丰儀尤與文事親到處玉尺攜
濯濯桃與李公門耀春姿平生遊宦蹟豈於浙有私廿年
曾蒞處復此紆旌旗九遷宸眷重再到民情俟夙昔舊
寮案今皆手版持祿養致豐膳躬自進盤匱裹封有常
典鶴書頒紫泥先生乃蕭然不以榮名羈青鞋白布襪
靈壽聊自隨淞江與浙水一碧無參差扁舟任來往輕橈
漾瀾漪暇則偕諸孫選樹坐苔磯弗賭太傅囊弗含右軍
飴一經課精義松聲和唔咿黃花晚節茂桂子清香披圖
中皆實境非事藻繪爲賤子瞻令望四世相乳孳潘爲春
生庚辰禮閣分校所得士而朱先生則芳圃先生瓊漿
壬申浙間分校所得士也師友淵源四世於茲矣瓊漿
膾馥古錦收餘絲年來返蓬蒿正堪侍接離鴻烈如見巧

向學未爲遲

贈圖侯益亭時候以副都統鎮京口

貔貅百隊擁花驄
照耀轅門海日紅
玉牒銀潢九天上
高牙畫戟大江東
羲之龍虎揮毫健
思訓雲山設色工
頻枉旌麾下茅屋
賢侯真有古人風

題元人四時冊子卽效元人詩體四首

冰魂月魄玉精神
香色生來不染塵
流水斜暉閒立久
方知桃李是餘春

蕉衣羽扇綠陰中
曲沼迴廊宛轉通
自是清襟涼似水
不關楊柳幾層風

千山秋氣暮蒼蒼
砧杵聲中萬瓦霜
一片斜暉如許淡
疎

林略爲染丹黃

石磴寒林取次行
雙尖皓影向人傾
詩家意致嫌穠俗
故把紅衫點玉英

秋筠閣聽王女彈詞

秋筠小閣倚春雲
閣外梅花上夕曛
不用銅瓶供新蕊
箇人齒上有清芬

潘握篲自寫秋林讀畫圖三首

詩宗與畫派異出而同源
妙悟匪文字難與世俗論
華嚴萬樓閣變化空中雲
三昧唯所現非有典要存
槎柯兩角石蕭寂獨樹邨
此亦有何好好之忘饗飧
乃知靜者心別具一乾坤
勺水非自飲誰能辨涼溫

君本善畫人性復愛讀畫矮卷錦囊裝高幀玉叉挂如彼
貨殖家多販乃供賣手腕倪黃趨神明關董會俱來聽指
揮勿用別流派吾觀今學者兔園甘守隘雲夢吞胸中翻
恐成芥蒂萬卷與萬里對君聊一快

憶余初識君

謂雅堂

君髮始垂頰端好如女郎皎皎潔白晰相知
有鮑子謂雅堂玉樹雙株碧夜窗聯咏處寒月梅花坼廿年

一分手往事盡陳跡塵氛各自撚流光那暇惜今看畫裏
人風味宛疇昔秋風動疎林落葉鏗墮石而余華髮滋回
首慚物役卷中好山多一角借栖息

徽州吳青涯畫梅花冊子

何人能寫梅花照純以天機鬪清妙流水斜暉黯淡姿板

橋竹屋荒寒料一幅疎枝漏早春一幅繁葩倍有神微風
不動露華靜缺月欲墮空庭昏就中一幅尤超越多買胭
脂點紅雪那知姑射神仙人豔服濃妝更姝絕青涯去今
百歲多眼前盡手難追摩昨過孤山最深處落英欲盡大
如何

除夕前二日閩門晤黃長汀卽送其歸閩二首

向晚停歸棹登君水上樓笙歌連比屋燈火照中流暮歲
離弦箭吾身不繫舟雞鳴扶醉別生事是沙鷗

聞君春便發浮海慙歸家

長汀將由乍浦泛海歸閩

帆席開天幕魚龍

捲浪花杭榔青映水荔子錦蒸霞倘遇支機石應知舊客

槎

予曾山闊泛海至琉球

祝芷塘典試蜀中寄到宿大安驛夢與子論詩近
作次韻荅之

高車印笮相如貴小艇吳淞魯望閒偏爲縈懷今舊雨飄
然飛夢水雲間槐街何日重連轡松徑多時不啓關應是
相思能識路風烟千里霎時還

暮秋爲杭州之游除夕始獲旋里燈下雜紀五首
野雲無事任風飄又到西泠十二橋楓磴經霜紅十里菱
湖含雨碧雙橈閒人合占名山福彈指堪驚舊會遙惟有
銀蟾無恙在且依清影試吹簫

二十年前雙冊使

謂周海山司馬
全穆齋閣學

相從於此駐華旌鷗波

澹月中宵去龍節長風萬里行歸日榮名高斗岳頻年野

興戀柴荆誰知車笠重逢處一笑湖光照眼明

頃司馬視學浙中閣

學又典試來此亦奇邁也

少年落拓占詞壇老去生涯倚釣竿千呂雲隨 隆運轉

釣天樂合衆心歡

時子編訂浙省祝釐新樂府甫成

璫筵醉客饒風韻玉

洞仙姝謝綺紈笑付紅兒歌一遍江花私喜未全殘

花城酒國一畱連早是蕭蕭歲暮天浩蕩襟期揮碧盞溫

柔情味入冰絃懷人多在紅梨署

謂雷峯並塘

憶事難忘白玉

鞭往與並塘並轡遊舊侶尙餘蘇易簡

蘇明府燦為雷峯並塘夙好

吳

山踏雪上層巔

門外梅溪接柳溪經時小別便依依籜孫不掃全遮徑稚

子相親早候扉泛綠且散幽歲酒踏青須預製春衣家園

客館何分別却是佳辰也憶歸

題新安吳氏娑羅樹舊園圖園爲中書舍人吳菴
所闢今已易主其曾孫克勲購得是圖

亭古池荒月影寒娑婆老樹半凋殘平泉金谷同零落未
必能畱畫卷看

夢樓詩集卷十一終